

Santiago chu'o tocha saosi'ea'me

Chu'o saosi'ea'me

¹ Chu'u, Santiago, Diona'me Maire Paaku Jesucristo'te cho'oché cho'okaikujj mʉsanʉkonare mai aipāiʉ Israel chíi docerepana jojosinani chu'o saomʉ, si'achejñarʉ te'ekuanuchi'a sani pa'inare. ¿Pa'iche?

Diopi cho'okaiʉna pa'imásiche'me

² Asarepajũ'u, chu'u majapāijana. Mʉsanʉkonani pa'ivesacheji si'ache ti'jñekʉna ñani pojojʉ, “Re'omʉ chu'ure”, chíijʉ pa'ijũ'u, ³ iere masijʉ: Jesucristoni cuasajʉna pa'ivesache ti'jñekʉna kokarekoñoã paajʉ cu'are jʉvomasiʉ cu'ache cho'oma'ñe pa'ijʉ Repaʉni ũcua cuasani rekoñoã na'a rʉa re'oja'che pa'imásirekoñoã paajanaa'me. ⁴ Jã'aja'ñe pa'imásirekoñoã paañu chini pa'ivesache ti'jñeñe cuhema'ñe ũcua Dioni cuasajʉ pojojʉ si'arʉmʉ na'a rʉa re'oja'che pa'iche'te che'chejʉ pa'ijũ'u, mʉsanʉkonapi re'ojarekoñoãre paajʉ Dioni masi cuasajʉna re'oja'che pa'iche karamanea'kʉ chini.

⁵ Mʉsanʉkona ũcuaʉakujj te'eʉ re'oja'che pa'ivesʉni Dioni sēejũ'u, cho'okaaʉ. Repaʉ'te sēenare ũcuaʉkore cuhema'ñe pojokʉ karama'ñe peore cho'okaiʉ pa'iku'mʉ Repaʉ repa'na sēeñe. Jã'ajekʉna mʉsanʉkonapi sēeto cho'okaija'mʉ Repaʉ. ⁶ Jã'ata'ni Repaʉ'te sēni Repaʉ cho'okaijache jachama'ñe cuasajũ'u. Repaʉ cho'okaiche jachana repa'na rekoñoã rũhirekoñoã peonajejʉ chiacha fa'akũjña ũcuaʉakã'jño tuta saocojñoñeja'ñe cuasame. ⁷⁻⁸ Pāiʉ jã'aja'ñe pa'iku te'eñoã cuasakʉ te'eñoã jachakʉ sēmʉ. Repaʉ, “Dios

chũ'ure ĩsija'mũ", chiiũ cuasaku sēesi'e koomaneja'mũ, rūhiñe cuasamaũ ũcuarepa cho'oma'kũjekũ.

⁹ Chũova'ũ pa'iva'ũpi Jesucristo'te cuasaku Dios ĩsiche re'oja'chere paaku pojokũ paaũ. ¹⁰ Ũcuachi'a kuriũ Diopi repaũ kurineesi'ere tuasõũna pojokũ paaũ; kurineena korosi'e si'asõñeja'ñe na'mi si'asõme. ¹¹ Oteñũã ũsũũji ruarepa asuto kuene jũnisõ repañũã koro re'oja'che ñosi'e tuã'tua cho'osõmũ. Kurineekũ'te ũcuachi'a jã'aja'ñe ti'jñemũ. Repaũ na'a ruã kurire koora chini põse koo ĩsirũmũna cho'osõja'mũ.

Cu'ache cho'ũache juvomasiche'me

¹² Pãiu vatipi repaũni cu'ache cho'ochete chũ'ũkũna juvomasikũ cho'omaneni pojomũ. Jã'aja'ñe cho'otajaisirũmũ repaũji vati chũ'ũsi'e cuhekũna Dios, "Chũ'ure chiinare ija'chere ĩsija'mũ chũ'ũ", chiisi'ere, Ũcuana'me ai re'oja'che pa'iche'te ĩsija'mũ repaũ'te. ¹³ Chekurũmũ pãiu repaũni cu'ache cho'ũache cuasoto, "Diopi chũ'ũcosomũ ie chũ'ure", chiimanea'kũ. Repaũ Dios cu'ache cho'ochejẽ'e cuasamaũ te'eũ'terejẽ'e cu'ache cho'oa'ju chini chũ'ũma'kũamũ. ¹⁴ Maire pãiu ũcuanũkore maire cu'ache cho'ũache cuasoche'te cuhema'ñe ũcua cuasaju pa'ito na'a ruã cho'ũache cuasomũ. ¹⁵ Jã'aja'ñe cuasokũna cu'ache cho'oneejũ juvoma'ñe cho'ome mai. Si'arũmũ na'a ruã cho'oju pani jũnisõsirũmũ cu'achejana saijanaa'me mai, cu'ache cho'osi'e ro'i. ¹⁶ Chũ'ũ majapãijava'na, tĩñe cuasama'ñe jorechũ'o cuasama'ñe pa'ijũ'ũ. ¹⁷ Re'oja'che pa'iche peore mũmũpi raiche'me, Dios pa'ichejapi. Cũnaũmũ pa'iche peore cho'osi'kũ Dios ĩsiche'me jã'a re'oja'che pa'iche. Si'arũmũ Ũcuau pa'iu Repaũ cho'ochete chũ'vosi'e sa'ñeñeja'ñe sa'ñema'ñe ũcua re'oja'che cho'okũ

pa'iku'mu Repa. Jã'ajekuna cu'ache cho'oche chũ'uma'kuam. ¹⁸ Repa chiiche'te cho'oku maire Repa chu'o ũcuarepare asa chẽarena pa'iche re'oja'chere ĩsisi'kuam Repa, maipi Ũcuani charo jovo pa'iche mamare pa'ij paaru chini.

Diore masi cuasaju pa'iche'me

¹⁹ Asarepajũ, chu'u majapãijana. Iere cuasaju chekuna pã i'kache asa cuhema'ne pa'iju si'areparumu i'kama'ne pa'iju ũcuachi'a na'mi pe'rumanejũ.

²⁰ Dios chiiche pe'rucheji re'oja'che cho'oma'nea'me.

²¹ Jã'aja'nejekuna musanukona rekoñoã cu'ache cuasachena'me cu'ache cho'oche peore ũhasõ Dios chu'o musanukona asa chẽasi'ere cuhema'ne pojoj cho'oj pa'ijũ. Maipi repachu'ore masi cuasaju asaju pa'ito mai rekoñoã re'ojarekoñoã care'omu.

²² Jã'ata'ni musanukonapi tĩne cuasamaneũ chini asachechi'a asaju pa'imanejũ; repachu'o chũ'ũne cho'oj che'cheju pa'ijũ. ²³⁻²⁴ Pãiu Dios chu'o asakuta'ni repa chũ'ũnejẽ'e cho'oma'ku ñare'avaji repa chia ñasi'kuta'ni churi sani repa chia ñasi'e, "Jã'aja'imũ chu'u", chiima'ne teana cavesucheja'che cho'omu. ²⁵ Jã'ata'ni pãiu repa asa chẽasi'e Dios chu'o re'oja'che chũ'ũne cavesuma'ne cuasaku jã'aja'ne pa'ima'kuam. Repa re'oja'che cho'ora chiiche Dios chu'o chũ'ũne jachaku ũhasõma'ne pojoku cho'oku pa'iku'mu.

²⁶ Ũcuauakuj Diore pojoj cho'omajñarũ ru cho'okuta'ni juvoma'ne ũcuauache i'kaku pani tĩne cuasakujeku ru cho'ote'em repamajñarũ. ²⁷ Mai Ja'ku Diopi ñato Repa'te masi cuasaju cho'oche ija'chea'me: Chu'viva'nana'me va'jeva'nare ña oiju cho'okaichena'me, chu'ova'na cuasaju oiva'nare

churokaichena'me Repau'te cuasamana cu'ache cho'ocheja'che cho'oma'ñe pa'iche.

2

Ūcuapa'ruvachi'a ūcuankore re'oja'che cho'oche'me

¹ Asarepajũ'u, chu'u majapãijana. Maire Paaku'te Peore Masiu'te Jesucristo'te cuasanajeju chekunare pãĩ ūcuapa'ruvachi'a re'oja'che cho'ojũ pa'ijũ'u. ²⁻³ Chekurumu musankona chi'i pa'ivu'ena kuriu, aniñocava pachokuricava ju'iu, kãña rua re'ojakãña ju'ikũji rani kakato repau'te re'oja'che cho'ojũ, "Ichejana re'ojachejana puujũ'u", chiime musankona. Ūcuate'erumu chuo'va'u pa'iva'u, kãñarũã rua aikãñarũã ju'iu rani kakamu. Chekurumu jã'ava'ureta'ni, "Jã'achejare ruvu nukajũ'u mu'u. Jã'apãani chejarepare puu ñu'ijũ'u", chiime. ⁴ Jã'aja'ñe cho'oni musankonare cho'ouache'te cu'are cuasaju chekunare pãĩ ūcuapa'ruvachi'a re'oja'che cho'oma'me. Jã'aja'ñema'mu Jesucristo'te cuasana cho'oche.

⁵ Chu'u majapãijava'na, masi asajũ'u ie: Pãĩ icheja cheja pa'irumu chuova'na pa'iva'nare repanapi Ūcuani masi cuasaju, Repau, "Chu'ure chiinare iere ñsija'mu chu'u", chiisi'ere ñsiuna koo Repau pa'ichejana sani Ūcuana'me re'oja'che paapu chini chẽamu Dios. ⁶ Jã'ata'ni musankona chuova'na pa'iva'nare cu'ache cho'onaa'me. Musankonare cu'ache cho'onani kurinarechi'a re'oja'che cho'oñu chiime musankona. Jã'ata'ni repanare põsero'ire ro'ima'to musankonare chẽa jñajñu sa pãĩ chẽañe chũ'unare ti'jñeñena nuko, "Ro'ijũ'u", chijju ke'reme repana musankonare. ⁷ Ūcuachi'a musankonare Paaku'te Re'oku'te Jesucristo'te rua cu'ache i'kanaa'me

repana kurina. Jã'ajekuna, ¿je'se pa'iana musanukona repanare na'a re'oja'che cho'oñu chiiche?

⁸ Musanukonare Peore Chũ'uku Dios, “Ija'che cho'ojũ'u”, chiiu chũ'uuna aperumu ija'che chiiche tocha jo'kasi'e, “Chekunare pãi oiju cuasajũ'u, musanukona meñe oiju cuasacheja'che”, chiiche'te cho'oni rua re'oja'che cho'ome. ⁹ Pãi ucuanukore kurinana'me chũova'na pa'iva'nare ũcuapa'ruvachi'a oiju cuasaju pa'ijũ'u. Musanukonapi jã'aja'ñe cho'oma'ñe kurinarechi'a na'a rua chiiju pani Diopi ñato cu'ache cho'ome, Repau chũ'uñe'te jachaju. ¹⁰ Pãiju Dios chũ'uñe peore cho'okuji te'emaka cho'omaneni Diopi ñato peore jachaku cho'oma'ñeja'ñe pa'im. ¹¹ Repau Dios, “Musanukona pa'imanare ja'me kãimaneju'u”, chiiu chũ'usikuipi Repau, “Pãi vaimaneju'u”, chiiu chũ'uasomu. Jã'ajekuna pãi repana rũjoromi peonare romineemanata'ni pãire vanisõni Dios chũ'uñe'te jachame. ¹² Jã'ajekuna mai re'oja'che cho'oñu chiiche Chũ'uku Dios musanukona cho'osi'e ro'i chũ'ujañere cuasaju i'kaju, pãi ucuanukore ũcuapa'ruvachi'a oiju re'oja'chere cho'ojũ pa'ijũ'u. ¹³ Reparumu Dios musanukonare chekunare oimanesinajeju'na sãine oimaneja'm. Jã'ata'ni musanukona chekunare oiju pani Diopi ũcuaja'che ña oiũ chũ'uuna re'oja'che pa'ijanaa'me.

*Chu'*ochi'a i'kama'ñe cho'och'e'me

¹⁴ Asarepajũ'u, chu'u majapãijana. Pãiu, “Diore cuasaku'mu chu'u”, chiikuji re'oja'che cho'omaneni peoche i'kaku pa'im. Masi cuasama'kujukuna Dios repau'te vati toa sani uuche ñsekaimaneja'm. ¹⁵ Chekurumu Diore cuasakuni chekurumu Diore cuasakoni repao irumu chiiche kãnana'me au

karamu. ¹⁶ Musanukonapi repava'ore karache'te ña re'oja'che cho'okaimanapi rupu chu'ochi'a re'oja'che cutuju, “Re'oja'che sani, ãu mu'ure uache cho'o ãijũu. Ūcuachi'a mu'ure susuto kãña ruikãñare sa'che ju'ijũu”, chiito, ¿ũquepi re'oja'u repava'ore? Cho'okaicojñoma'mo repao. ¹⁷ Diore cuasache ũcuaja'che pa'imu. “Diore cuasaku'mu chu'u”, chiikujj re'oja'chejẽ'e cho'o ñoma'kupi rupu chu'ochi'a i'kaku Repau'te masi cuasama'kujeku peoche i'kaku cho'oma'ñe masime mai.

¹⁸ Chekurumu pãi ija'che i'kame: “Diore cuasakusomu jãu. Ikuta'ni re'oja'chere cho'okumu”, chiime. Jã'ata'ni pãi re'oja'chere cho'omaneni, ¿je'se repaña Diore cuasache cho'o ñojanaa'ñe? Chu'u Diore cuasache'te cho'o ñoku re'oja'che cho'okumu. ¹⁹ Mu'u, “Dios Ūcuate'eu'mu”, chiiu cuasakujeku masi cuasamu. Jã'ata'ni vati ũcuaja'che Dios pa'iche'te masiju vaju chuju kurukurume. Jã'ajekuna rupu cuasaju pa'ima'ñe ũcuachi'a re'oja'chechi'a cho'oju pa'iche chiimu maire.

²⁰ Tiiñe cuasamanejũu. Pãi, “Diore cuasame chukuna”, chiinapi re'oja'chere cho'o ñomaneni Repau'te masi cuasamanajeju peoche cutuju pa'ime. ¿Jã'a vesuche musanukona? ²¹ Dios mai aipãiu'te Abrahamre repau cho'ochete ña, “Re'okumu iku”, chinasomu, repau mamaku'te Isaare ũsema'ñe Repauni isiku vani uosõkaipi'rache'te ñani. ²² Jã'are cuasa ñato Abraham Dios chũ'usi'ere cho'oku repau Diore masi cuasache cho'o ñosi'e masire'omu. ²³ Jã'are kuaku aperumu Dios chu'o tocha jo'kasi'e repau Abraham pa'iche ija'che kumu:

Abrahamre Repau'te masi cuasakujekuna, “Re'okumu iku”, chinasomu Dios,

chiimu repa tocha jo'kasi'e. Repu Abraham, “Diore ja'me pa'iku'mu iku”, chiicojñoasomu.

²⁴ Chura ie masime musanukona: Maire ũcuachi'a Repute masi cuasanani, “Re'onaa'me ina”, chisa chini Dios mai cuasachechi'a ñama'ñe mai cho'оче ũcuachi'a peore ñaku pa'imu. ²⁵ Aperumu Rahabre si'uromio pa'isi'kore ũcuaja'che, “Re'oko'mo iko”, chiniasomu Dios repao ija'che cho'osi'ere ñani: Repao pa'ijooopo pa'iche'te ñajani ra repa majapãire kuuñu chini charo saisinani repao vuena chave cuaa ku ma'a tiiima'api co'choasomo repao. ²⁶ Cheke ija'chea'me: Pãi uuji rekocho peoni jünisösi'kuujeku cho'oma'mu. Diore cuasache ũcuaja'chea'me. Pãiuuji, “Diore cuasaku'mu chu'u”, chiikuuji re'oja'che cho'omaneni Repute cuasarepama'kuujeku peoche i'kaku jünisösi'kuuja'che cho'oma'mu.

3

*Ch*u'opo cho'оче'te kuuamu

¹ Asarepaju'u, chu'u majapãijana. Iere masiju Dios chu'o che'chona jairepanuko pa'imaneju'u: Mai chekuunare che'chomasina Dios pãi ũcuanuko cho'osi'e ro'iche chu'urumu maipi Repu chu'o che'choche'te masi cho'omaneni Repu chu'u'ne'te vesuju cho'omanesinare na'a ruu cu'ache cho'ocojñojanaa'me. ² ũcuanuko te'eñoã tiiñe cho'oju pa'inaa'me mai. Jã'ata'ni pãiuuji jmamakaruje'e cu'ache i'kamaneni re'okujeku cu'ache cho'оче peore juuvora'amu. ³ Kavachoji maini jachamanea'ku chini chu'opona frenomaka juuoru ũcuuachejña tachoju kuhare'omu repute. ⁴ ũcuachi'a choovu uujavu pa'iche'te cuasaju'u. Ruu uujavuuji ruu tuta saocojñouta'ni tachova'tiru ruu jmava'tiruuji pãiu repavu tachoku repute uuachejña

tachokũ kuhare'omũ. ⁵ Chũ'opoã ũcuaja'che cho'omũ maire. Rũa jmachũ'orũãta'ni ũcuachũ'orũãpi rũa si'ache i'kajũ cho'onaa'me mai, repachũ'opoã chiiche cho'ojũ. Toa ũcuaja'che rũa jmatoarũjẽ'e airo rũa ũjaairo peore uusõmũ.

⁶ Chũ'opoã ũcuaja'che toa pa'icheja'che pa'ichũ'opoãjekũna pãi repana chũ'opoãpi cu'ache i'kajũ cacu'ame. Pãi repana chũ'opoã vati aipi chũ'ũkũna charo jmamakarũ cu'ache cho'o che'chesõ si'arũmũ na'a rũa cu'ache cho'ojũ cacu'asõme. ⁷ Pãi cheja pa'iva'nare cu'ava'nare ũcuauava'nare, rũni ku'iva'nana'me pĩ'ava'nana'me añana'me chiacha cava'nare chẽa repava'na cho'oche ũsemasijũ jo'cha paame. ⁸ Jã'ata'ni repana chũ'opoã cho'oche te'eu'terejẽ'e ũsecu'akũna repana chũ'opoãpi cu'ache i'kajũ eo ũkuacheja'che chekũnare pãi rũa si'ache cu'ache cho'ome. ⁹ ũcuate'echũ'opoãpi mai Ja'kũre Diore re'oja'che i'kajũ Repaũ cho'osinare ũcuaujanani pãi cu'ache i'kajũ pa'inaa'me mai. Jã'aja'ñe i'kajũ Diore cu'ache i'kajũ pa'inaa'me mai. ¹⁰ Mai chũ'opoã ũcuate'echũ'opoãpi re'oja'chena'me cu'ache i'kajũ pa'inaa'me mai. Asarepajũ'ũ, chũ'ũ majapãijana. Jã'aja'ñe cho'oche cu'amũ. ¹¹ Okocoje ũcuate'ecojere oko re'oja'chena'me cu'ache pa'ima'mũ. ¹² ũcuaja'che higoñũ aceitunacaã kũicu'amũ. ũcuaja'che pĩsi ũcheme higopũã kũicu'amũ. Asarepajũ'ũ, chũ'ũ majapãijana. Okocoje ũhaoko pa'icoje oko re'oja'che pa'icu'amũ. Jã'ajekũna i'kajũ cu'ache cho'omaneñũ chini cu'ache i'kaũatojẽ'e jũvoñũ mai.

Dios ãsiche pa'imasina cho'oche'me

¹³ Mũsanũkonare ja'me pa'ikũji Dios chũ'ore asamasikũ re'oja'che pa'imasikũ chekũnare i'ka

jñauma'ñe repau cuasaku re'oja'che cho'oku pa'iche cho'o ñoa'ku. ¹⁴ Jã'ata'ni musanukona rekoñoã chekuna neemajñaruã tua paauache cuasani, re'oja'cheja'che cho'oju, “Masikujeku re'oja'che cho'oku'mu chu'ũ”, chiiju joremanejũ'ũ, musanukonani pãipi re'oja'che i'kaa'ju chini che'choni. ¹⁵ Jã'aja'ñe pa'iche Dios ñichema'mu. Rupu pãi Diore cuasamanare vatipi chu'ũukuna cuasache'me jã'a. ¹⁶ Pãi, chekuna neemajñaruã tua paauachena'me chekunanani re'oja'che i'kacojñoñu chini re'oja'cheja'che cho'oche cuasana cheke cu'a peore ùcuuache si'ache cho'onaa'me. ¹⁷ Jã'ata'ni Dios ñiche pa'imasina cu'achejẽ'e cuasama'ñe chekuna ùcuuako ñaju'te re'oja'che pa'iju ñonaa'me. Cheke cavama'ñe pe'keru pa'iju chu'ũ'ũñe jachama'ñe cho'oju pa'inaa'me. Ûcuachi'a pãi ña oiju chekunanare ùcuupa'ruvachi'a re'oja'che cho'oju jorema'ñe re'oja'che cho'oju pa'inaa'me. ¹⁸ Pãi cavama'ñe pa'iju chekunanapi ja'me re'oja'che paapu chini che'chosina na'a pa'isirumu na'a rua re'oja'che pa'imasijanaa'me, chekunanare re'oja'che pa'iche che'chosi'e ro'i. Repana che'chocojñosina ùcuachi'a na'a rua re'oja'che pa'imasijanaa'me.

4

Diore cuasamana cho'ocheja'che cho'oñu chiinare chu'vache'me

¹ ¿Je'se cuasaju musanukona sãñeche'i'a cuheju cavaju pa'iche? Musanukona rekoñoã cu'ache cho'ouuache si'arumu cavanajeju sãñeche'i'a cuheju cavaju pa'ime. ² Musanukona chiiche'te cu'amajñaruãre peuju jña paacu'akuna chekuna neere tua paauache cuasaju cavaju vanisõnaa'me musanukona, repa paasi'ere tua paañu chini. Diore sãemanajeju musanukona chiiche

jñaama'me. ³ Chekurumu Repau'te sēni tīñe cuasaju sēeju kooma'me, rupu musanukonare uachechi'a ũcuache cho'oñu chini sēeju. ⁴ Musanukona Diore re'oja'che ja'me pa'imanaa'me. ¿Je'se cuasaju musanukona Repau'te cuasamana cho'ocheja'che cho'oñu chiiche? Diore cuasana cho'ochema'mu jā'a. Repau'te cuasamana cho'ocheja'che cho'oñu chiina Diore cuhena cho'oche cho'ome. ⁵ Dios chu'o aperumu tocha jo'kasi'e ija'che kumam:

Mai rekoñoã Repau ĩsirekoñoã oiũ te'eũ paara chiimũ
 Dios,
 chiimũ. ⁶ Jã'ajekuna Repau maire si'arumu na'a ruu cho'okaiũ pa'imũ. Dios chu'o pa'ikorovu tocha jo'kasi'e ija'che kumam:

“Pa'imasinajeju Diore chiimanaa'me chukuna”, chiiju cuasana cho'oche ĩsemũ Dios.
 Jã'ata'ni, “Pa'ivesunaa'me chukuna”, chiiju cuasanare re'oja'che cho'okaimũ Repau,
 chiimũ. ⁷ Jã'ajekuna musanukonapi Dios chiiche'te peore jachama'ñe cho'ojũ'ũ. Musanukonapi vati chũ'ũñe'te cho'ocuheju juvoto jo'ka sanisõja'mũ vati. ⁸ Musanukonapi Dioni cuasaju Repau'ni sēeju pa'ito ja'me pa'iu cho'okaija'mũ Repau musanukonare. Cu'ache cho'ona, musanukona jũjña meno choasõñeja'ñe cu'ache cho'oche ũhasõ re'oja'chere cho'ojũ pa'ijũ'ũ. Dios chiichena'me Repau'te cuasamana cho'ocheja'che cho'oñu chiina, Dios chiima'ñere ũhasõ Repau chiichechi'a cuasaju cho'ojũ pa'ijũ'ũ. ⁹ Musanukona cu'ache cho'osi'ere cuasaju ota oicheja'che oiju pa'ijũ'ũ. Soju pojoma'ñe oiju sumava'na pa'ijũ'ũ. ¹⁰ “Vesunaa'me chukuna”, chini cuasa Dioni cuasaju pa'ijũ'ũ. Jã'aja'ñe cho'oto na'a ruu masinare caruñoja'mũ Dios musanukonare.

Majapāijanare ke'rema'ñea'me

¹¹ Asarepajũ'u, chu'u majapāijana. Sãinechi'a cu'ache cutuma'ñe pa'ijũ'u. Repana majapāijanare ke'reju cu'ache cutuna Diore cuasanajeju na Dios chũ'uñe'te cuheju ke'reju cu'ache cutucheja'che cho'ome. Dios chũ'uñe cu'ache cutuna repachu'o chũ'uñe'te asa jachaju ke'reme. ¹² Repa chũ'u jo'kasi'ku Dios pã ùcuanuko cho'osi'e cuasa ña vati toa saochena'me Repau pa'icheja saiche chũ'uku Ûcuate'e'u'mu. Mu'ujẽ'e, ¿jeeja'ijeku chekuna pã cho'osi'e cuasa ñamasiku?

Che'ro pa'ijache vesuche'te kuamu

¹³ Musanukona ija'che i'kana, asarepajũ'u, “Irumu pãani che'ro v'ejooona sani te'eũsurumu pa'iju pōsere koo ïsiju kurire na'a ruu jñaaju pa'ijanaa'me mai”, chiina. ¹⁴ Che'ro pa'ijachejẽ'e vesunaa'me mai. Mai pa'iche, ¿ũquea'che? Pikoja'che pa'iju jma-makaru pani si'asōnaa'me mai. ¹⁵ Ija'che i'kato'te na'a re'omu, “Maipi vajuva'na pani Diopi ùsema'to mai cuasache cho'ojanaa'me mai”, chiito. ¹⁶ Jã'ata'ni musanukonare ti'jñejañe peore masina cutucheja'che cutume musanukona. Vesunata'ni, “Masime chukuna”, chiinaa'me. Cu'amu jã'aja'ñe i'kache. ¹⁷ Iere cuasajũ'u: Pã Dios chiiche cho'omasinapi cho'omaneni cu'ache cho'ome.

5

Kurina cho'ocojña'ne'me

¹ Musanukona kurina, asarepajũ'u. Musanukonare cu'ache ti'jñejañere cuasaju ruu oiju pa'ijũ'u. ² Musanukona chi'i paache cu'amajñaruã peore phũ'kasōjañea'me. Musanukona kãña re'ojakãña chuchu ãnisōjañea'me. ³ Musanukona paache kurire're

maconosõjare'rea'me. Kurire're maconoñeja'ñe mʉsanʉkona chekʉnare oima'ñe cu'ache cho'oju pa'ime. Jã'ajekʉna mʉsanʉkona cu'ache cho'osi'e ro'iju pa'ijanaa'me. Irʉmʉ pãĩ ũcuanʉko cho'osi'e ro'iche Dios chũ'ũmucuse ti'api'rarʉmʉjatʉ'ka kuri chi'iju pa'ijanaa'me mʉsanʉkona. ⁴ Mʉsanʉkonare cho'oche cho'okaiju ãu tʉakaisiva'nani ro'imanerena Dioni kʉaju oiju pa'ime repana, mʉsanʉkona cu'ache cho'osi'e. Oiju kʉajʉna asa Repʉ Maire Paakʉ Peore Masiuji cho'okaija'mʉ repanare. ⁵ Mʉsanʉkona icheja chejare pa'iju cu'amajñarũ si'ache re'oja'che paaju pojoju ãu ũcuatʉche rʉarepa ãiju vaca jujucheja'che jujuju pa'ime. Jã'ajekʉna vacava'nare vanisõñeja'ñe cu'ache ti'jñeja'mʉ mʉsanʉkonare, Diopi chũ'ũna. ⁶ Re'oja'che cho'ova'nare pãĩ sãĩñe cu'ache cho'ocuhejʉna cu'ache cutuju vanisõnaa'me mʉsanʉkona. Jã'ajekʉna mʉsanʉkona cu'ache cho'osi'e ro'iju pa'ijanaa'me, Diopi chũ'ũna.

Pojoju cha'aju Diore sēejʉ pa'iche'me

⁷ Asarepajũ'ũ, chʉ'ũ majapãijana. Maire Paakʉ jo'e rajachere pojoju cha'aju pa'ijũ'ũ. ãu tãsi'kʉ oko pa'ito pojomʉ. Repʉ tãsi'epi ãupi re'oja'che ainee rʉa kũkʉna tʉa ĩsiku repʉ kuri koojachere cuasakʉ pojokʉ cha'amʉ. ⁸ Mʉsanʉkona ũcuaja'che Diore cuasache ũhasõma'ñe pa'iju pojoju cha'aju pa'ijũ'ũ; Maire Paakʉ jo'e na'mi rajja'mʉ.

⁹ Asarepajũ'ũ, chʉ'ũ majapãijana. Sãĩñechi'a ke'rema'ñe pa'ijũ'ũ, Diopi mʉsanʉkona cu'ache cho'oche'te ro'iche chũ'ũmanea'kʉ chini. Repʉ Dios pãĩ ũcuanʉko cho'oche ro'iche Chũ'ũkʉji raipi'ramʉ, mai cho'osi'ere ro'iche chũ'ũra chini. ¹⁰ Asarepajũ'ũ, chʉ'ũ majapãijana. Aperʉmʉ Dios chʉ'o kʉasina

cu'ache cho'ocojñonijĕ'e Dios chũ'uñe ũhasōma'ñe ũcua pojojũ cho'oju pa'isi'ere cuasaju che'che ũcuaja'che pa'ijũ'u. ¹¹ Chu'u cuasato pāipi repanani cu'ache ti'jñetojĕ'e juvo koka paaju Dioni ũcua cuasani pojome. Musanukona Job pa'isi'e kũache asasinaa'me. Repau'te cu'ache ti'jñerũmu Maire Paaku'te Diore repau cuasache ũhasōma'ñe ũcua cuasaku paniasomu repau. Repau'te cu'ache ti'jñesirũmu Dios Pāi Ūcuanukore Oi Aijeku repau'te ruu re'oja'che cho'okaniasomu. Maire ũcuaja'che oi re'oja'che cho'okaija'mu Repau.

¹² Chu'u majapāijana, ie ũcuaja'che asajũ'u: Musanukona i'kachu'ore pāipi jachamanea'ju chini Dioni roiju i'kanaa'me musanukona. Jā'ata'ni jā'aja'ñe cho'omanejũ'u chiimu chu'u. Ūcuachi'a Repau mamire ve'ocuheju, cnaamuna'me cheja roiju i'kama'ñe cheke ũcuache te'emakajĕ'e roiju i'kamanejũ'u. Musanukonapi joreju si'arũmu jā'aja'ñe i'kama'ñe ũcuarepa pa'ito, “Ūcuarepaa'me”, chiito, chekurũmu joreche pa'ito, “Pāamu”, chiito jachamanejanaa'me pāi. Ūcuachi'a musanukonapi jā'aja'ñe cho'oto Dios ña pe'rumaneja'mu musanukonare.

¹³ Musanukonare te'enare cu'ache ti'jñeto Dioni sĕejũ'u, cho'okaau. Pojojũ pani Repau'te ujaju pojojũ'u. ¹⁴ Te'eu ravuna jūni Jesure cuasana ainani soni raojũ'u Dioni sĕekaiju Maire Paakuji chũ'ukuna repau'ni u'chape'ere roa'ju chini. ¹⁵ Repanapi jachama'ñe, “Cho'okaija'mu Repau”, chini cuasaju sĕeto jū'iva'u vajuja'mu Diopi vasokuna. Ūcuachi'a repauji cu'ache cho'osi'ku pa'ito Dios tunosō jo'e cuasamaneja'mu repava'u cu'ache cho'osi'e. ¹⁶ Jā'ajekuna musanukona cu'ache cho'оче sāiñechi'a kaju Dioni sĕekaiju pa'ijũ'u, Repauji vasokaau

m^usan^ukona rekoñoã. Pãiu re'ok^uji Dioni s^ẽeto repa^uji r^ua u^ache cuasaku s^ẽe^una Dios r^ua re'oja'che cho'okaija'm^u repa^u'te. ¹⁷ Aper^um^u Dios chu'o kuaku pa'isi'ku Elías, maija'iuji já'aja'ñe r^ua u^ache cuasaku okopi ramanea'ku chini Dioni s^ẽku^una icheja cheja oko rache cuhasõ chote^ũsur^um^u jo'e cheku^ũsur^um^u joopo^ujat^u'ka ramaneasom^u. ¹⁸ Já'aja'ñe pa'isir^um^u ũcu^uji jo'e Dioni s^ẽku^una okopi jo'e ra^una pãi chiño ãu jo'e k^ũniasom^u.

¹⁹⁻²⁰ Asarepaj^ũ'^u, chu'^u majapãijana. M^usan^ukonare ja'me pa'ik^uji Dios chu'o ũcuarepa chu'^ũ'^uñe'te masi cho'oma^u ma'a caves^usõ tĩñe saicheja'che cu'ache pa'iva'^uni cheku^upi cho'okai^una jo'e repava'^upi re'oja'che saito repa^u'te cho'okaisi'ku vati toa sani uuche ^ũsekaichena'me repa^u cu'ache cho'osi'ere Diopi t^unosõ cuasamanea'ku chini cho'okaisi'ku pa'iche masij^ũ'^u. Re'om^u.

Santiago

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc